


古桐書屋六種



詩經古風



昨
非
集

序

此集始名四旬集蓋集中所編入大率四十以前作也
余之少也學不知道雖從事於六經然頗好周秦閒諸
子又汎濫諸仙釋書并騷人辭客之悲愁放曠惜衰暮
感羈旅者亦未嘗不寓目焉故當時所作指趣多所出
入且有傲然自得而不知其非者豈非沈溺之甚也哉
四十後乃始悔之又後則欲勿存之矣旣而思之非與
是不容偏掩者也是中有非非中亦豈必無是狂言聖
擇理或同與且卽未必有是然存之以著其非庶鑒余
非者得以及時趨是而不至若余之過時而悔與偶憶
陶淵明辭有昨非二字因以名集昨之云者豈獨爲四

十以前言之乎四十以後附入者自視實亦未見是也
故並以昨非槩之光緒三年三月朔日興化劉熙載融
齋自序

昨非集總目

卷一

寤崖子

卷二

文

卷三

詩

卷四

詞

卷四附

曲

印光集

總目

寤崖子自序

余作寤崖子或問所以名書之義余曰偶然耳過則忘之矣抑或寤者見之謂之寤崖者見之謂之崖矣乎猶憶滿洲文秀菴見此書云取類得於易博依得於詩敷暢似說苑新序非深悉事物之理其何能爲秀菴抱道隱於擊柝故不輕許人者然是言也余蓋未之信焉方思有所改且益以復質於秀菴今秀菴已逝余遂不忍復益亦無所改姑以其所及見者存之凡四十二篇

寤崖子目錄

株拘它

器水

魚習

解荀

辨欲

墨者

學墨

翼名

魯叟

蜀莊

海鷗

吸靈

噓吸

師曠

彭祖

辨惑

辟怪

山海經

儒問

陳仲子

封難

范蠡

饗螳螂

荀卿

曹參

虛邑酒

問射御

鄴醫

市藥

求忘

志臧

无妄

鵠占

善戒

馮婦

蔣氏狗

善射

圃叟

秦醫

觀物

問和

善飲酒

昨非集卷一

興化 劉熙載 融齋

寤崖子

株拘它

株拘它謂寤崖子曰觀物者必於其大何子之所徵者小也寤崖子曰乾爲馬坤爲牛安見大之異於小乎蓋圓象天軫方象地安見小之異於大乎曰吾猶恐子之所以小而蔽大也是當與子詳辨之然今者天將雨矣願以異曰曰將雨子何以知之曰礎潤而蟻出也曰雨之所係大矣乃徵之小而及於礎蟻子恐我以小而蔽大然則子知其將雨乎蔽其將雨乎

器水

器水有實今以多竅竅之器畜濁水於中其外流者求一竅竅之不濁不可得也欲清其流必盡清其器中之水吾於此而知善之源於性也貧窶者日事借貸其祖父所藏之窖金近在咫尺而不知也有長老示以其處發之可資一生之用則快然無復他求吾於此而知性之無不備也有二人執火夜行其火一則固明一吹噓而後明要於明焉而已必赴之塗或步而至或輿而至要於至焉而已吾於此而知性教之所歸一也夫恆言不可以無徵況於性教乎

魚習

畜文魚僂者寤崖子之鄰也寤崖子向聞畜是魚者水宜井雨入焉則病試之果然閒以語僂者僂者曰督哉子之畜魚也子信以爲魚之性病雨乎今夫民之生於北者不畏寒生於南者不畏暘非其性也其習也夫魚之生卵於水也草則承之必置水於他器移草於中燠諸日一日而葩再日而蘇三日而其中隱然如有物四日而化使其初不雨之避則葩焉者已與雨相習況繼此乎今育卵者始則取水於井而避雨如恐不及是旣習於井矣而雨何以入焉畜魚之久者孰與吾未或有病於雨者使之熟習焉而已豈別有所以易其性也哉寤崖子聞之恍然若有悟也欲進請其所學而弟子尋

至曰夫子何與彼言今將有切問也曰何問曰將問乎性與習也曰性觀其習習乃成性請益不答頃之指僂者曰盍師此此至人也至人學於萬物性習之理吾與爾深求之而愈闇者此乃於畜魚得之也

解荀

凡謂之善者人所欲存也謂之惡者人所欲去也或曰性可去乎曰惡乎可然則荀子言人之性惡何也曰荀子欲去其累性之性也曰累性之性荀子雖謂之非性豈不可乎曰我不謂之性人謂之性矣我不謂之性則人必大惑而我終無以救其失故不若性之也荀子以爲吾不謂之性雖不謂性惡可也是固不能害吾性焉